

Dithero tsa Tirelano mo Kutlwanong

Thero ka moletlo wo go gopola tso go ya Morena, e le ka 08. 04. 2012

21/2012

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 130 - 118/119

2. Thapelo: Morena Modimo, Rara yo o mo legodimong yo o tsositseng Morwao mo losong gore ka ene o re baakanyetse tshiamo ya gago, o re thuse gore re itshwarelele mo go ene, re nne ditokololo mo mmeleng wa gagwe, ene e nne tlhogo mo go rona. O re tsenye ka ene mo pusong ya gago ya kgalalelo kwa a busang teng le wena le Mowa o o Boitshepo, a fentse baba botlhe ba gagwe. Amen.

3. Epistolo ka fa thulaganyong ya 2 e kwadilwe mo go 1 Bakorinthe 15:1-11;

Efangele ka fa thulaganyong ya 1 e kwadilwe mo go Mareko 16:1-8.

4. A go ipolelwe tumelo ya bokeresete!

5. Sefela sa 120 - 108/-

6. Thapelo ya mmadi wa thero.

7. Lefoko la thero ka fa thulaganyong ya 4 le kwadilwe mo go

1 Samuele2:1-2.6-8a, le re: "Ke fa Hana a rapela a re: 'Pelo ya me e dudueletsa MORENA. Lonaka lwa me lo thatafaditswe ke MORENA. Molomo wa me o bulegetse baba ba me. Gonne ke itumelela pholoso ya gago. Ga go na ope yo o boitshepo jaaka MORENA; gonne ga go na ope kwa ntle ga gago; ga go na lefika le le tshwanang le Modimo wa rona. Se bueng tsa maikgantsho a magolo ka gale; a tsa matepe di se ka tsa tswa mo melomong ya lona. Gonne MORENA ke Modimo o o itseng tsothle; ditiro di tlhatlhojwa ke ene. Mara a dinatla a robegile; mme ba ba theekelang ba itlamile ka thata. Ba ba neng ba kgora ba ile go jaka dijo; ba ba neng ba bolawa ke tlala ba a kgora. Moopa le ene o belege ba supa; mmabontsi o swabile. MORENA o a bolaya, e bile o a tshedisa; o folosetsa kwa felong ga baswi, e bile o tlhatlosa teng. MORENA o a humanegisa, e bile o a humisa; o a kokobetsa, le gona o a godisa. O tsosa ba ba fokolang mo leroleng, o tsholetsa bahumanegi mo thotobolong go ba nnisa le batlotlegi; o ba ruisa sedulo sa bogosi sa kgalalelo. Gonne maotwana a lefatshe ke a MORENA, o beile lefatshe mo go ona! O tla sireletsa dinao tsa baitshepi ba gagwe, mme baikepi ba tla swela mo lefifing; gonne motho ga a kgone sepe ka thata ya gagwe. Ba ba lwang le MORENA ba tla phatlakanngwa; o tla ba dumisetsa maru kwa legodimong. MORENA o tla athola dikhutlo tsa lefatshe, a naya kgosi ya gagwe thata, a natlafatsa lonaka lwa motlodiwa wa gagwe.'" Amen.

8. Thero: Phuthego ya Morena yo o tsogileng, Jesu Keresete, Lefoko la thero ya kajeno ke sefela sa tumiso. Ke sefela se se lebanyeng le botshelo jwa mo lefatsheng leno, le jwa jo bo sa khutleng, mmogo le tatlhego e e sa khutleng. Ka se opelwa ke Hana yo e neng e le mosadi yo o tlotlegileng mo Beibeleng, le mo dipolelong tsa lefatshe. Ke sefela se se rerang, jaaka se tlhotlheleditswe ke Modimo. Ke ka ntlha ya moo, fa se bolokilwe gore se ithutiwe ke rona le kajeno mo Lokwalong lo lo Boitshepo. A re reetseng thero eo ka fa tlase ga tlhogo e e reng: **MORENA ke yo o tshedisang.**

Re batho, re lebagane ka metlha le loso, le meriti ya lona. Re a boga, re utlwiwa botlhoko mo mmeleng le mo moweng, re a tshagwa, re tshelwa lonyazo. Go na le ba ba re tiilang, le go re tlhopholola, ba bangwe ba athola go ntsha mewa mo go rona, ba a re bolaya. Hana o ne a tshagiwa, le go nyadiwa, ka a ne a se na bana mo motseng wa ga Elekana. O ne a na le botlhoko, matshwenyego, botutu, gonne go ne go se sepe se a ka se dirang go fetola kemo ya gagwe. Ga a ka a kgona go itumedisa monna wa gagwe le ba ga gabo. Tseo di tshwana le mo ditshikeng tsa rona kwa ba lebeleletse gore ngwetsi e nne ngwetsi tota. Yo e leng moopa o tshwerwe ke bothata. Go na le banna ba ba nyatsang bahumagadi ba bone, ba re ba paletswe ke go ba itumedisa mo tirelong ya mo kamoreng. Maye, bagaetsho, a re ba utlwele, ke raya ba ba sa lebogeng ka tsela e e ntseng jalo. Re utlwele le banna ba ba kopanang le se se tshwanang le tseo - ba teng! Ke nnete. Kana re ba ba ntseng jalo. Tseo di mmogo le se re se itseng, fa batho ba tshela ka kemo e e bokete mo go kalo. Molaetsa o re o bonang ka Hana ke wa gore kemo ya gagwe e maswe, mme le fa go ntse jalo, Modimo o a e bona, o a e

itse. Ke ona o o tshedising gape, o mo tirong ya go tshedisa. Re ka o ikanya, re dumele mo go one ka ntlha ya ditsholofetso tsa ona mo go rona, o ikanyegile mo bathong ba ona. Le Hana o ne a nna mo tumelong, a rapela, a ikanyega, a tlotla Modimo. Ke sona se re se utlwang, fa a ne a solofetsa go neela ngwana wa gagwe mo tempeleng ya Morena. Ke se a se dirileng tota morago. Ke se se thata go neela ngwana yo a mo lebeletseng sebaka. Le fa go ntse jalo, o ne a dira jalo, a ikanya gore Morena o na le ene yo e leng moopa, a mo tlhokomele, le fa go diragala jang gore a nne le boitumelo a sa ntse a tshela.

Le mo go rona go ka driagala gore re lete nako e telele go ya Modimo o rata go dirafatsa sengwe se re se kopang. A re leteng, le go disa, re dumele, ene o re naya moputso wa tumelo ya rona o e leng tshagofatso. Mono mo lefatsheng go na le khumanego le lohomo ka metlha, go na le ba ba bokoa le ba ba thata, ba ba kgotsheng le ba ba bolawang ke tlala. Ka tumelo e e tshwanang le ya ga Hana re ka bua gore tsotlhe tseo ga di fete thata le thuso ya Modimo. Tsotlhe di tlhodilwe ke ona. O nonofile go fetola tsotlhe ka ponyo ya leitlha ka fa thatong ya ona.

Loso lo lo neng lo le fa pele ga Jesu mo botshelong jotlhe jwa gagwe lo ne lo mo fetsa mo bofelong, a lala mo lebitleng. Botshelo jwa gagwe jwa fetoga go nna loso le moriti wa lona. A lala mo lebitleng malatsinyana fela. Rraagwe a mo tsosa, a tsosa Mowawe. Morwa Modimo o ne a sa bone go bola. Baswi ba bangwe ba beilwe gore molelo o ba fetse. Ba tla nyelediwa ba ba diretseng Satane, o tla ja ba ba neng ba sa direle Modimo mo lefatsheng leno. Mme Jesu ke maitibolo wa rona mo gare ga ba ba tsositsweng, o ne a sa gorogiswa teng koo. A tsoiwa, a nniwa ka fa le le jang la ga Rraagwe, e le Motlhanka wa botlalo. Ka moo Rraagwe a mo tsenya mo botshelong jo bo sa felang ka ntlha ya rona.

Le ditlalelo le loso lwa rona ke lwa sebakanyana fela, le matshwenyego a re tshwenya, fa re sa ntse re tshela, a re itshokeng! Matshwenyego ga a nke a busa mo dipelong tsa rona, fa Morena a re femela. Tsa matshwenyego di tla fela. Bokete jo re bo bonang, re mo go jona, bo tshwayiwa ke Morena fa a re tsenya mo go jona ka maikaelelo a go leka le to tiisa tumelo ya rona. Morena o nonofile go bo khutlisa ka fa thatong ya gagwe ka nako ya gagwe. Bagaetsho ba bantsi ke basupi ba se se diragetseng gore bokete jwa bone bo fetoge boitumelo. Fa gare ga rona go na le ba ba neng ba nyalana, ba ne ba sa fetse gore ba eme ka tlotlego ka fa thutong, mme morago ba bona tiro, ba phologa mo dikotsing, ba amogelwa sešwa mo selalelong.

Ka Jesu Keresete yo o tsogileng mo lebitleng, le rona re ba ba tsosiwang mo leroleng. Kgale Satane le bolelo bo re wisa mo leroleng jaaka mosimane yole wa seebana (Mar. 9). Ka Jesu re a tsoiwa, le go tshediswa. O bonye bosengsepe jwa rona, a tla mo go rona, a re humisa ka lehumo la legodimo, le e leng boswa jwa bogosi jo e leng go tshela le ene ka bosakhutleng. O re baakanyeditse manno gore re nne le bagolo ba ba fentseng loso le Satane. Ka kolobetso re dirilwe go nna phuthego e e boitshepo ya gagwe. Kgale re ne ra bidikama mo leroleng, re se na tsholofelo ya go phologa mo boleong. Jaanong re tlhapisitswe, re apesitswe kobo ya botshelo, re amogetswe mo ntlong ya bogosi jwa gagwe. Ga go tlhole go le teng sepe se se ka re nyatsang, le go boifisa ka bosula. Re tiisitswe kwa re emeng teng mo tumelong e e reng: Jaaka Jesu a tsositswe mo losong, le rona fela jalo re tla godisiwa, re fiwe mebele e e tshwanang le ya Mofenyetsi wa rona ka bosenabokhutlo.

Ke kwa re tshwanetseng go mo leboga teng, le go opela mmogo le baengele, re galaletse tiro ya gagwe ya go tshagetsa lefatsheng le legodimo, le go di boloka mo thatong ya gagwe, bogolo mo tirong ya gagwe ya go pholosa batho. *“Ga ke boife sepe, le fa e ka nna eng! Ga go na thata epe e ‘ thibellang phupung. Lefatshe le ka reng? Le loso lone ke eng? Ka yo o re swetseng e le yo o tshelang.”* (Sefela 130 - 118/119:5) Amen.

9. Thapelo: “Ke go leboga thata jang, Morena yo ‘ ntshwetseng! Ke wena yo ‘ mpolokelang tse o di mpatletseng. Mogang ke swang, ke tla boifang? Ke tla swa ka kagiso.” Amen. “Sefeka 134 - 122/125:8)
Thapelo ya Morena: Rara wa rona yo o mo legodimong ...

10. Sefela sa 124 - 112/114

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke M. N. Mntambo, ka ngwaga wa 2011.
Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.